

Der to za gadenken...

S ist an to abia vil òndra, vour de tir schnaips viavl as kònn. Abia vil òndra vòrt boas i nèt bos tea', de sai' lònk de tag en binter ont de zait gea't nia verpai. Hait is mer en kopf kemmen za nemmen auser de schtròtzn van kòstn za schaug menn es s hòt òlta klòttn za bèrven vort. Der mitter kassetin gea't nèt au, s pareart as der ist u'gahenk, pet en ziachen gea't mer au gor der dritte kassetin, en sèll as i hòn òlbe sperrt galòt, s hatt mer za vil bea gatun za tea'n en au. S earst ding as de sich, ist a deckl va boll gamòcht pet en ackerle, i nimm s es ont leig mer s as a bòng, s ist nou linn abia a vòrt, s pareart mer za hearn nou en tschmòch van kin. Beil as i leig s es as en pett de zachen netzn de mai'na bòngen, i boas nèt men de schell òlls auser ziachen oder menn de schell bider òlls zua sperrn. I tua a ker ròstn, vour de tir schnaips òlbe mear ont der bint tròk umanònder en schnea. Òlls hait, s bètter, der kassetin as au gòngen ist, òlls bill mer mòchen gadenken. S doi' ist nèt an to za sperrn bider òlls zua, s ist nèt an to za sperrn bider s mai' hèrz, s ist an to za gadenken. Asou òmbiar i za ziachen auser a stickl as de vòrt òlls sèll as i sèlber vour vil jor hòn gahòt hi'galeick, i puck me a ker keing en kòstn ont ziach auser a baises tschantl, sèll van taven, ont leig s es drau as en deckl. S hòt nèt vil dinger mear drinn, a durrs pissel hosearler ont vergissminicht, a vingerl gamòcht pet dinna raisler va larch ont an òltn letrat pet drau an schea'n kriager, der mai' Franz ont hinter en letrat bea'ne beirter, tschrim as taitsch: "Du wirst immer im mein Herz bleiben, dein Franz.". I hatt nia gamoa't as tuat mer nou asou bea gadenken s mai' lem. Pet en letrat en a hònt ont s vingerl en de ònder kear i um en jor as i hòn pakemmp s mentsch a s en bea'ne zait hòt mer gem mear abia sèll as vil lait kinnen der gem en an gònzn lem, ont pet de ang keart keing en bòlket hait òmbiar i za gadenken...

S ist gaben s jor 1916, s lem ist nèt gaben asou dèster, s ist gaben s kriag, men hòt se pforchtn ont vil vòrt hòt men gor gahungert. I hòn lai zboaks jor gahòt, der tata ist gaben unter kriag, de mai'na priader sai' klea'ner bos i gaben, i hòn gamiast hèlven en de mama. En de sèll zait do en Bersntol hòt s gahòt vil osterraicha kriager, de hom praucht grea'sara kinder, baiber ont eltera mander za òrbetn ver sei. I pin aa gaben oa'na van seng, biar baiber hom gamiast anau trong as en pèrg munizionen, sticker aisen ont òlls sèll as de tschòffen hom ens. S ist gaben a schbara òrbet ober i hòn es gearn gatun

vavai de hom ens tzolt ont pet en sèll bea'ne as i hòn darbist hòn i kinnt hëlven de mama za kaven eppes z'èssn. Es sai' schoa' zboa, drai mu'net as i pin austònne en òlla de vria ont, pet an korb as en puckl pet drinn draisk, viarks kile pin i gòngen finz as de Panarotta, ont pet miar vil òndra. An to en hourneg, hòn i gamoa't za kinnen nea'mer envir gea', i pin earst en Stoa'na gaben, s hòt tschnim glaich abia hait ont der bint ist asou stòrch gaben as hòt mer pareart as der virft me um. S ist gaben a kelt van taivl, òll tritt as de gatun hòn bin i abaus en schnea finz kan knia, vour miar sai gaben viar kriager pet zboa muschattn, sei hom òlbe de muschattn praucht za tròng anau zaich. I hòn nèt gahòt stivai ont an rock, i pin nòss abia der mist gaben, pet en sèll bètter hatt ber vil mear zait praucht vour as der bartn anau as de Bassa gaben. S hòt gahòt an moment as de hatt me gabellt leing sem mittlt en schnea', sperrn de ang ont bòrt n as schnaip me in. En glaich moment, i boas nèt vavai oa'n van kriager hòt se keart kein miar, der hòt mer gareickt de hònt za belln mer hëlven, i hòn gahèart de mai'na knia pucken se, s ist mer plim lai de zait za sechen de sai'na schea'n grean ang as hom e u'tschauck vour za derletzn ont za volln en de sai'na òrm. I pin augabòchen en dru, tsezt nem miar an kriager as hòt mer gareickt a stickl proat, s peist as i hòn gèssn en mai' lem ont de mai'na ang hom se bider pakemmp pet de glaichen grean ang as de tsechen hòn vour za derletzn. Der hom ens u'tschauk a boltens ker ont beil as der hòt mer galeick a deck as de òcksl n hòt er kein: “Servus, ich bin Franz!”. En sèll to as en miar hòt s mer pareart za kinnen nea'mer envir gea', der sèll kriager ist gaben ver mi abia a liacht en de tinckl, s mensch as hòt mer bider de kròft gem za gea' envir, der hòt mer gem a hònt za stea' au ont van sèll moment sai' ber envir gòngen zòmme, pet im glaim hòn i nea'mer gaheart de mia, de kelt ont en hunger, i hòn me nea'mer aloa' gaheart ont asou is gaben ver im aa. Van sèll to her òll vòrt as i gòngen pin as n pèrg er ist gaben pet miar ont men der hòt eppes gahòt hòt er s toalt pet miar. Der hom ens varstònne gor men der hòt klòfft as taitsch, der hom nèt praucht vil beirter, s ist ganua gaben u'schaung se en de ang. I moa as i hòn en gearn gahòt van earst to, der Franz ist gaben en mai' hèrz van sèll moment as de ingern ang hom se pakemmp. No bea'ne tag hòn i schoa' gabist as i hatt gabellt s gònz lem pet im plaim ont er aa glaich. S ist nèt asou dèster gaben za kinnen se vinnen aloa' abia der gabelt hattn, ober benn as men gearn hòt se vinnt men òlbe en be za plaim zòmme. Nea'met hòt ens kinnt mear vèrr hòltn, nanket de kriager ont nou minder de mai' mama. S hòt nèt gahòt an to as biar hom ens nèt tsechen, de zait ist vir gòngen, ont an to no en ònder hom ber ens kennt òlbe mear ont hom ens òlbe mear gearn gahòt. Der binter hòt galòt

plòtz en langes ont biar sai' nou òlbe zòmmen ka pèrg au gòngen, er pet en sai' muschatt ont i pet en mai' korb as en puckl ont pet de mai' hònt en de sai' hònt i nea'mer de mia gaheart. An to, a ker unter en Pfler, der Franz hòt me tzouchen as a sait ont hòt me pfiart en a bis voll va schuakuke, hosearler ont fergissminicht, men de sperr de ang hear i nou en sèll guat tschmòch van hosearler. Semm hòt er mer gem a schea's pissel plea'mbler ont a vingerl as der hòt gamòcht gahòt pet dinna raisler va larch. Der hòt mer s galeick en vinger ont hòt mer pfurst men de hatt en gabelt haiertn benn as kriag garift bar, benn as der kinnt hatt, hatt er mer tschenkt a vingerl va golt. Van sèll to hònt i nicht vergèssn, sèll vingerl ver mi hòt balert mear bos golt, s ist s glaiche as iaz no souvl jor hònt do en de mai' hònt pet en pissl hoearler. Zboa to dano pin i hoa'm gaben, i hònt me nèt guat gaheart, a ker vour de tschai', pin i semm en haus gaben za kochen de plent, benn as de gaheart hònt tèckln en de tir, i hònt gamoa't as der Franz ist kemmen gaben za schaug abia de plaib ont pin pahenn gòngen za tea' au. Vour de tir hòt s zboa kriager gahòt, de glaichen as sai' òlbe zòmmen pet ins as de pèrg kemmen, de hom me gagriast a'ne za schaug me u, pet en kopf vour nider ont semm hònt i verstònnen as eppes gea't nèt. De zboa kriager hom nèt praucht vil beirter song, benn as de hom keing gahòt: "Der Franz ist...", hònt i sa nanket galòt riven, s hòt nèt praucht, i hònt schoa' gabist as der Franz storm ist ont pet an schroa pin i pfolln en de òrm van kriager derletzt. I pin augabòchen en haus as de pònk, nemm miar de mama ont de zboa kriager as pet bea'ne beirter hom mer keing as der Franz ist kemmen tschossn en vall, en de glaich bis bou as bea'ne to vour hòt er mer pfurst za tea' n en haiertn, semm mittlt de seng schea'n plea'mbler as hom en asou pfolln. I pin gòngen pet de zboa kriager, i hònt en gabelt sechen nou a vòrt vour as de hattn en unter galuckt ver òlbe semm en de inger bis. En sèll to zòmm pet en Franz ist kemmen unter galuckt gor a stickl van mai' hèrz. Òll jor en langes pin i anau za vinnen en ont òll jor de hosearler hom er tschenkt en sai' tschmòch, s hòt mer pariart as semm ist er nèt aloa'. No as der storm ist gaben pin i nea'mer gòngen za òrbetn ver de kriager, i pin nea'mer guat plim, s hòt mer pareart za belln nea'mer lem. No zboa mu'net, benn as de verstònnen hònt za bòrt a kin, pin i pahenn en kommer gòngen, i hònt gareart finz as de hònt zachen gahòt ont nèt being as de hònt s kin nèt gabelt, being as der Franz ist nèt semm pet miar gaben za bòrt s zòmmen. Van sèll to hònt i me bider lebet gaheart, i hònt nea'mer tsechen de zait za sechen s kin, a stickl van mai' Franz. De zait ist vir gòngen ont s kin ist au'gòngen en glaich to as i vour a jor hònt kennt gahòt en sai' tata, en moment as de mama hòt mer galeick s kin en òrm ont as de

tsechen hòn de sai'na schea'n grean agler, hòn i me bider vroa gaheart ont sèll kloa' kin hòt mer s hèrz pfillt. S ist nèt dèster gaben za zigln a kin a'ne an tata, en de seng jarder a baib as hòt gahòt a leideges kin ist kemmen u'tschauk abia a schlandra, ober de mama hòt mer gaholven ont hòt me nia aloa' galòt. I hòn s es gahoasn Karin abia de mama van Franz. An to no en ònder de zait ist vir, der krieg ist garift ont s kin ist gabòcks, pet de sai'na grean ang hòt s òll to mear en sai' tata gaglichen. S hòt ens pfillt s lem, s ist gaben ver ins abia de bòrm sunn no a scheikets bètter. Benn as hòt gahòt zboa jor, en binter is runt derkrenkt, s hòt gahòt bea en paichl ont viaber. Der mai' pruader hòt ens pfiart pet an karett finz en Persn ont va semm pet en zug sai' ber gòngen en Trea't en spitol. S kin ist òlbe tschlèchter plim, der dockter hòt kein as hòt gahòt peritonite ont as der hatt probiart za operiarns es, der hòt mer tschòffen za ziachen s o, s ist gaben hoas abia an gluat. Enderbeil as i hòn sa o'tzouchen, de mai' Karin hòt me u'tschauk pet de sai'na grean agler, vour za sperrn sa ver òlbe, de ist storm en de mai'na òrm, vour de mai'na ang ont i pin pfoln as en pett pet en kin as mi. Semm en sèll kammerl s mai' lem ist garift zòmmen pet n lem van mai' kin. Benn as de pin au'gabòchen hòn i ganommen s kin, hòn s es in garirlt en an deickl ont hòn s es vort, i hòn s es gabelt bider hoa'm trong. Men hatt nèt kinnt ober der dockter hòt me galòt gea', der hòt verstònnen en mai' loat, der hòt mer keing za tea' lai nèt spiun as ist schoa' toat gaben. S hòt vil lait gahòt en sèll to as en zug, i hòn me tsetzt nemm an baib, i hòn gahòltn s kin nemm miar, s hòt mer pareart za miasn s bermen, s baib hòt òmbiart za klòffen ont i pet an vinger as en maul hòn en gamòcht verstea' za schbaing ont lòn schloven s kin, i hòn nèt kinnt spiun as s mai' kin ist toat gaben, i sèlber hòn nèt gabelt glam. Abia hatte gatun za glam as de sai'na ang bartn ver òlbe sperrt plim? De lait um miar hom klòfft ont galòcht, i hòn tschauk ka bòlket aus, s hòt gahòt a schea'na sunn, ober ver mi hòt se nea'mer rècht galaichtn, men hòt tsechen de lait no de be as sai' gòngen ont kemmen abia òll to, òlls ist en vir gòngen abia as bar nicht tschechen gaben. Lai ver mi de bèlt en sèll to hòt se stillt, i hòn bider u'tschauk s kin, s sai' kloa' misl ist gaben keart kein miar, s hòt pareart as schloven tuat, en sèll moment hòn i verstònnen as i hatt nea'mer kinnt bissn a bell a lem as gahòt hat, a bell a mensch as kemmen bar, menn de hatt si aa kennt a mensch as hatt sa gearn gahòt asou abia der sai' tata hòt me gearn gahòt mi. Benn as der ka Persn gaben sai', pet en toat en hèrz ont s kin en òrm pin i giatla umkeart hoa'm. En to no en òbito hòn i galeick òlls sèll as hatt mer gamòcht gadenken de Karin ont en Franz en an kassetin ont hòn en sperrt zòmmen pet en mai' hèrz. En drai jor hòn i kènnt, gearn gahòt ont verluon ver òlbe

[illegible]